

痘科正宗

卷三

陳鳴和堂



全無矣

五成半痘

至於六成以下又難言矣成色愈下則條例愈多不得不多分層次以爲治法之規則有如熱不二日而卽出者或先見點於身而後見於面或見於面形亦可觀而不甚起先見於身者却見長言其形雖稠而充肥或稀而多板有尖綻者卽有焦頭者頭雖焦而根得鬆形雖尖而血不勻言其色雖紅而間有帶紫



者却蒼老而不艷或有不紅者雖不紅而不至於板
有數顆帶病卽有大半可觀者其神情較六成而雖
同其症狀比六成而却重此五成半痘也大凡五六
日雖長而根不甚鬆雖紅而色不甚活七八日雖成
聚而不得光澤九日雖成膿而不得充滿或板而不
綻或盤暈深紅而不收雖收而不能盡九日身必壯
熱大渴不已以後必帶火收靨寒戰厥逆或咬牙或
艱塞或大瀉或不食或聲啞或痰喘或目過期而不



開痂必燥溥而難脫或腐爛而不收餘毒般般而留
連百病皆見死而後蘇歷盡艱苦毀容殘相而始得
生者此五成半痘之大概也用藥以四日爲則用
劑一日二服始而活血透毒繼而清火涼血大約十
二三劑而諸病皆潛消矣

不贅治驗

五成痘

至於五成則險矣出自肺肝兩經之間存亡爭微危
之界痘中可嘉者半而可虞者亦半卽如熱嫌其太



盛雖盛而能安睡欲其安雖安而驚惕渴雖甚而不
至唇燥口雖膩而不至生胎點宜先見於頭面而見
於身者却多痘最忌其倒出而先見於身者却鬆而
見長痘喜其稀稀而多板痘嫌其密密而得肥形慶
其尖而平者半色欲其潤而滯者半根欲其紅而白
者多紅喜其活而紫艷亦不少顆欲其勻而間有攢
簇形懼堆聚而得分珠有通身過於紅者而喜其不
艷有通身過於白者猶喜其粗壯有爲內傷所滯者

有爲外感所束者例難屈指類此可推症狀大約類
五成半形色但不及其稍鬆活耳不治無一生者其
症至六日而血猶不勻七日面雖有漿而通身猶板
八日雖少有漿而色如蒙垢有板黃者有水泡者九
日必帶火倒靨諸惡症皆集餘毒般般有半月者有
二十餘日者有至一月餘者終不能保其生也用藥
四五日時三大劑可以不死以根血得透而膿漿立
其本也至十五劑而全愈矣

附一色白治驗

東郡白介公五公郎甫一周痘失治於前六日
通身暗白而板絕無血色身涼而煩神情愁楚急
求予而不得延一不諳者視之介老問曰通身而
白血虛乎血淤乎平扁不起氣虛乎氣滯乎彼直
認爲虛症答曰弱怯症幸介老明理而不之信邀
予視予曰血若虛不過紅而淡世豈有無血之兒
乎以血淤於內故曰氣滯而不得其權故扁火伏

於內散身涼而煩却喜其磊落粗壯痘期七日行
漿漿者血所化也今已六日而血不透漿何由而
成時不容少緩用大劑大黃六錢去生地加歸尾
三錢紫草三錢自午至寅連投五服正面之血皆
透日夜又六劑通身之血盡活且綻而身始熱以
血活而火能透也至晚面上行漿八日大便淤血
如墨汁通身成膿身又大熱去歸尾紫草加生地
八錢石膏六錢三劑九日又一劑熱和神爽寢食



大安而愈

附一色紅治驗

吾邑張貞老次公郎七歲出痘痘在四朝深紅帶
紫磊落而稠却得鬆活此痘血熱而火得發揚者
也凡痘出齊其熱宜退而竟不退身猶大熱以火
原盛而不能盡發也急用大劑加石膏兩餘一劑
而熱卽退暫去石膏加紫草日以二服六日而血
皆勻猶嫌色重七日身又大熱去紫草以血活也

復用石膏以身太熱也至九日熱和而身潤血迹亦收飲食大進遂弗藥

附一姑息之戒

吾邑甲子一子一女同時出痘女痘細碎無倫且與肉色無別不可爲矣其子痘雖稠密却得充肥但色過於紅血太熱耳痘可五成得藥三劑可以不死以血活也十五劑而諸病可潛消後竟決意進藥三服以後執意不服強灌之而皆吐且神色



俱變以姑息之故而不忍強遂不藥予勸之曰血
雖活而熱猶不清涼後必帶火而收餘毒可畏也
今強之以藥後免受苦彼以姑息而終不藥後果
帶火而收二日不開十二日矣復邀予視予曰前
言之詳矣今日過期而不開其症甚重幸其胃氣
開而能食可無害於生特其目可慮也若急藥猶
可爲也終姑息而不肯強後二目皆廢悔何及矣

四成半痘

至於不足五成僅得四成半則又險矣大概皆類五
成但諸症較五成而少重耳用藥大劑可二十一
服又有較四成半而稍重較四成而稍輕謂之四成
二三分藥可三十劑其中細微曲折筆難逐項形容
閱歷久而自得之

附一倒出治驗

清源方燭老一公郎六歲甲戌出痘熱不二日而
出雖熱而不燥間亦能食微覺腹痛身上磊磊三



朝面無一點痘犯倒出形痘家之所最忌也先出者一顆在胸下鬆活而潤却亦見長熱勢較前漸輕燭老年方半百止此一子且又清奇可羨見其出痘舉家徬徨至於無措予慰之曰雖犯逆出然胸下一粒既能鬆活後頭面未必模糊且熱漸輕後出有限大約在四成以上用藥萬無一失卽以大黃八錢生地石膏亦如其數餘佐以青皮赤芍木通勞荊更加枳實倍用山查以傷食而腹痛也

連進二服大便一下諸症霍然次日頭面透齊雖稠而勻通身亦磊落有板有白而紅者色近於艷此四成半痘也藥得二十餘劑燭老惑於不諳者之言懼其藥之太峻也欲別投門戶胡素老聞之急赴其家曰一投別門此子休矣力主其說而復懇予之更切也予憐其子嗣之艱亦卽身任其事因素過於姑息進藥艱難權以三劑合一劑用大黃二兩五錢生地三兩餘亦類加去石膏枳實山

查加紫草六錢日一重劑二次服至六朝血勻而
綻七日頭漿滿而身漿半八日去紫草青皮加石
膏漿足光澤明潤胃氣大開九日膿老十日血收
漸靨大便五日不見却不覺其艱亦不理其事至
十一日大便方下不乾亦不泄十二日弗藥以後
飲食愈強肌肉生長精神倍增舉家狂喜遂爲異
傳云

附一不經治驗

東郡鄧上老次公郎五歲時痘在疎密之間却亦磊落有板者亦有嫩者通身絕無血色宛似白介公五子之痘但多油光耳色以油光較之彼而更重矣僅得四成一二分前數日眾說紛紛而無定見邀予視已六日矣七日當行漿六日夕而血猶不透亦危急之會也予卽以大黃八錢暫去生地加歸尾紫草桃仁餘佐以青皮赤芍木通荆蒡連投二服至二更兩頤活活潑潑血將透出予曰萬

無一失矣其兄問曰得藥幾何予曰三十劑衆皆
愕然又二服次日晨七朝矣正面血皆透至午血
過環跳至晚通身皆透板者亦鬆而面已行漿矣
去歸尾紫草桃仁加生地日夜五劑大便日四五
次下黑血水如墨汁三日方盡八日光壯如珠九
日膿老如蠟飲食大進以根血猶紅加石膏八錢
十日正面血收十一日身血亦歛熱勢頓和以後
弗藥而愈計其藥劑正三十劑相視七始信予